



Broj: 11-04-38-sl./14  
Sarajevo, 19.11.2014.godine

## ZA WEB

U utorak, 25. novembra 2014. godine se obilježava jedan od najvažnijih događaja koji su obilježili historijski put Bosne i Hercegovine, put borbe protiv fašizma i svih neprijatelja, unutrašnjih i vanjskih, koji su željeli stati na put demokratskom razvoju naše domovine.

Na ovaj dan, prije 71 godinu, u Mrkonjić Gradu je održano Prvo zasjedanje Zemaljskog antifašističkog vijeća narodnog oslobođenja Bosne i Hercegovine (ZAVNOBiH), čime su postavljeni temelji državnosti Bosne i Hercegovine, kao ravnopravne republike unutar jugoslavenske federacije, sa historijskim granicama koje datiraju još iz vremena srednjovjekovne Bosne.

Odbornici su usvojili Rezoluciju ZAVNOBiH-a i Proglas narodima BiH u kojima se ističe da ubuduće BiH i njene narode u zemlji i inostranstvu, mogu zastupati i predstavljati samo ZAVNOBiH i AVNOJ, odnosno jasno je istaknuto opredjeljenje njenih naroda da bude osigurana potpuna ravnopravnost Muslimana, Hrvata i Srba koji u njoj žive.

Nažalost, građani Bosne i Hercegovine su već u proljeće 1992. godine bili prisiljeni ponovo se braniti, jer agresija na našu zemlju, koja je počela u aprilu 1992. godine i trajala do novembra 1995. godine, je još jednom predstavljala veliko iskušenje za sve stanovnike ove zemlje.

Opet smo bili na ispitu koji je značio opstanak Bosne i Hercegovine ili njen trajni nestanak, ali kao i mnogo puta do sada, bosanski patriotizam i hrabrost njenih građana da brane svoju domovinu od znatno jačeg neprijatelja, je ponovo donijela pobjedu demokratskih snaga u ovoj zemlji.

Odluke Prvog zasjedanja ZAVNOBiH-a i danas predstavljaju osnovu demokratskih načela na kojima se temelji razvoj našeg društva i domovine u cjelini.

Svim učenicima i zaposlenicima u odgojno-obrazovnim ustanovama čestitamo Dan državnosti.

**Koristimo se prilikom da podsjetimo da je, shodno školskom kalendaru za 2014/2015. godinu, utorak 25.11.2014. godine, praznični, odnosno neradni i nenastavni dan.**

**NAPOMENA:** U ponedjeljak, 24.11.2014. godine se u svim odgojno-obrazovnim ustanovama odvija redovan nastavni i radni dan.

